

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINSKI SUD U BANOVIĆIMA  
**Broj: 127 0 K 075386 22 K**  
Banovići, 17.03.2023. godine

## U IME FEDERACIJE BOSNE I HERCEGOVINE!

Općinski sud u Banovićima, sudija Zlatko Šahinović, uz sudjelovanje zapisničara Šehić Begzade, u krivičnom predmetu protiv optuženog A.M., zv. T., sin M., iz B., ... , zbog krivičnog djela - Neovlaštena proizvodnja i stavljanje u promet opojnih droga – iz člana 238. stav 1. Krivičnog zakona F BiH, po optužnici Kantonalnog tužilaštva TK broj: T03 0 KT 0088499 20 od 06.05.2022. godine, nakon održanog neposrednog glavnog i javnog pretresa kojem je bio prisutan tužilac Kantonalnog tužilaštva Tuzlanskog kantona Tuzla B.E., optuženi A.M. i branitelj optuženog B.Š., zaposlenik Kantonalnog zavoda za pružanje pravne pomoći, donio je i javno objavio dana 17.03.2023. godine, u odsustvu uredno obaviještenih kantonalnog tužioca, optuženog i branitelja optuženog, donio je sljedeću

## P R E S U D U

### Optuženi:

**E.A., zv. T.,** sin M. i majke A. r. Š., rođen... godine u B., nastanjena u ..., općina B., pismen, po zanimanju NK radnik, zaposlen u RMU Banovići, lošeg imovnog stanja, neoženjen, po nacionalnosti Bošnjak, državljanin BiH, JMB: ..., do sada osuđivan, i to: **Presudom** Općinskog suda Banovići, br.Km-3/01 od 08.01.2002. godine, zbog KD iz čl. 283/2 KZ F BiH. Odgojna mjera-Pojačan nadzor roditelja- staratelja, **Presudom** Općinskog suda Živinice, br.Kp-285/04 od 16.02.2005. godine, zbog KD iz čl. 239/3 KZ F BiH na uvjetnu osudu 3 mjeseca zatvora, rok provjere, 1 godina, **Presudom** Općinskog suda Živinice, br.033-0-K-06-000 337 od 07.12.2006. godine, zbog KD iz čl. 293/1 KZ F BiH, novčana kazna u iznosu od 400,00 KM, **Presudom** Općinskog suda Živinice, br.Kp-349/05 od 21.05.2007. godine, zbog KD iz čl.287/1, a u vezi čl. 31 KZ F BiH, uvjetna osuda 9 mjeseci zatvora, rok provjere 2 godine, **Presudom** Općinskog suda Živinice, br. 33 0 K 023379 10 K od 20.04.2011. godine, zbog KD iz čl. 287/1 u vezi čl.31 KZ F BiH kazna zatvora 6 mjeseci, dana 05.09.2011.godine javio se na izdržavanje kazne zatvora u KPZ Tuzla, a 05.03.2012.godine, poslije izdržane kazne, pušten na slobodu, **Presudom** Općinskog suda Banovići, br. 127 0 K 039807 12 K od 17.03.2015. godine, zbog KD iz čl. 287/3 i u vezi čl. 31 KZ F BiH, kazna zatvora 1 mjesec, izdržao kaznu zatvora u KPZ dana 07.03.2016. godine, **Presudom** Općinskog suda Banovići, br. 127 0 K 041834 12 K od 23.02.2015.godine, zbog KD iz čl. 287/1 KZ F BiH kazna zatvora 3 mjeseca, izdržao kaznu zatvora dana 07.02.2016.godine, **Presudom** Općinskog suda Banovići, br. 127 0 K 070235 20 K od 19.10.2020.godine, zbog KD iz čl. 287/1 KZ F BiH u vezi čl. 31. KZ FBIH, kazna zatvora 8 mjeseci, **Presudom** Općinskog suda Banovići, br. 127 0 K 075251 20 K od 02.06.2021.godine, zbog KD iz čl. 239/1 KZ F BiH, uvjetna osuda kazna zatvora 3 mjeseca, rok provjere 1 godina.

## K r i v j e

### Što je:

Dana 22.04.2020.godine oko 14,20 sati, u ulici ... u B., protivno članu 4. stav 1., članu 19. stav 1. i članu 20. stav 1. Zakona o sprečavanju i suzbijanju zloupotrebe opojnih droga („Službeni glasnik BiH br. 8/06 od 07.02.2006. godine), iako je znao da se radi o opojnim drogama i psihotropnim tvarima i da je držanje radi prodaje i prodaja istih zabranjena, što je i htio, a radi sticanja protivpravne imovinske koristi, kod sebe neovlašćeno radi dalje prodaje držao tri pakovanja biljne materije, upakovane u tri providne pvc.folije, u ukupne količine 2,017 grama (0,805+0,643+0,569), tri pakovanja biljne materije, upakovane u tri bijele pvc. folije, u ukupne količine 2,361 grama (0,787+0,706+0,868) i jedno pakovanje biljne materije, upakovane u crvenu pvc. foliju, količine 0,673 grama, a koje biljne materije potiče od biljne vrste Cannabis sativa(L)-konoplje, a Cannabis sativa(L)-konoplje sadrži tetrahidrocannabinol (THC), koja je je Listom o utvrđivanju spiska opojnih droga, psihotropnih tvari i prekusura proglašena za opojnom drogom na Tabeli I, Liste opojnih droga, pod rednim brojem 13 („Službeni glasnik BiH br. 8/06 od 07.02.2006. godine“), i dva pakovanja stvrđute materije bijele boje upakovane u dvije plave pvc folije, ukupne količine 1,814 grama (0,456+1,358) koja materija sadrži „Amfetamin“, a „Amfetamin“ je Listom o utvrđivanju spiska opojnih droga, psihotropnih tvari i prekusura proglašena za psihotropna tvar, na Tabeli II, Liste opojnih droga, pod rednim brojem 1 („Službeni glasnik BiH br. 8/06 od 07.02.2006. godine“).

Dakle, neovlašćeno radi prodaje držao materije, propisom proglašene opojnim drogama,

Čime je, počinio krivično djelo – Neovlašćena proizvodnja i stavljanje u promet opojnih droga - iz člana 238. stav 1. Krivičnog zakona Federacije Bosne i Hercegovine, za koje mu Sud temeljem navedenog zakonskog propisa te članova 41, 42, 43. i 49. KZ F BiH, utvrđuje kaznu zatvora u trajanju od 1 (jedna) godine i 1 (jedan) mjesec, dok se na temelju člana 65. stav 1. i 64. stav 3. KZ F BiH, optuženom A.E. opoziva uvjetna osuda izrečena presudom Općinskog suda u Banovićima broj 127 0 K 075251 20 K od 04.05.2021. godine, pravomoćna dana 21.05.2021. godine, pa se kazna zatvora u trajanju od 3 (tri) mjeseca iz opozvane uvjetne osude uzima kao utvrđena,

pa sud optuženog temeljem člana 54. stav 1. i 2. točka b) u vezi sa članom 64. stav 3. KZ F BiH,

**OSUĐUJE**  
**NA JEDINSTVENU KAZNU ZATVORA**  
**U TRAJANJU OD 1 (jedna) GODINA i 2 (dva) MJESECA**

Na temelju člana 78. stav 1. i člana 238. stav 4. KZ F BiH, sud izriče

**MJERU SIGURNOSTI**

Od optuženog A.E. oduzima se opojna droga i to: Cannabis Sativa L-konoplja, u količinama od 2,017 grama, 2,361 grama i 0,673 grama, i psihotropnu tvar Amfetamin težine 1,814 grama, tj. količine koje su ostale nakon provedenog hemijskog vještačenja,

čije će uništenje izvršiti PS Banovići odmah nakon pravosnažnosti presude i o tome pismeno obavijestiti ovaj Sud.

Na osnovu člana 202. stav 1. ZKP-a Federacije Bosne i Hercegovine, optuženi se obavezuje na plaćanje troškova sudskog postupka, a koji se sastoje od troškova sudskog paušala u iznosu od 50,00 KM i troškova na ime vještačenja u iznosu od 45,00 KM, u roku od 30 dana od dana pravosnažnosti presude.

### **O b r a z l o ž e n j e**

Kantonalno tužilaštvo Tuzlanskog kantona Tuzla (u daljem tekstu KT TK-a) optužnicom broj T03 0 KT 0088499 20 od 06.05.2022. godine, optužilo je A.E., zv. T., iz B., ul...., zbog krivičnog djela – Neovlaštena proizvodnja i stavljanje u promet opojnih droga - iz člana 238. stav 1. Krivičnog zakona Federacije Bosne i Hercegovine.

Sudija za prethodno saslušanje je potvrdio optužnicu dana 25.05.2022. godine, nakon čega je osumnjičeni dobio status optuženog, a na ročištu o izjašnjenju o krivnji, optuženi se izjasnio da nije kriv za krivično djelo koje mu se optužnicom stavlja na teret.

Na glavnom pretresu održanom dana 14.03.2023. godine, optuženi je promijenio iskaz dat pred sudijom za prethodno saslušanje, te izjavio da priznaje izvršenje krivičnog djela koje mu se predmetnom optužnicom stavlja na teret.

Svoju izjavu o priznanju izvršenja krivičnog djela optuženi je dao dobrovoljno, svjestan posljedica priznanja izvršenja krivičnog djela.

Priznajući krivnju optuženi navodi da je krivično djelo počinio na način, mjesto i vrijeme kako je to opisano u optužnici KT TK-a. Optuženi ne spori niti jednu činjenicu koju je Kantonalno tužilaštvo navelo u činjeničnom opisu izvršenja krivičnog djela koje se optuženom stavlja na teret.

Na glavnom pretresu provedeni su dokazi uvidom i čitanjem u materijalne dokaze i to: Zapisnik PU Banovići o saslušanju svjedoka P.H. od 06.04.2021. godine; Zapisnik MUP Tk - Policijska uprava Banovići - Odjeljenje kriminalističke policije Banovići o pretresanju osobe, broj 08-06/13-1-/20 od 22.04. 2020. godine; Potvrda MUP Tk - Policijska uprava Banovići, o privremenom oduzimanju predmeta od 22.4.2020. godine; Obavijest Kantonalnog tužilaštva TK, broj T03 0 KTA 0088499 20 od 21.05.2020. godine; Naredba Općinskog suda u Banovićima za pohranjivanje - čuvanje privremeno oduzetih predmeta, broj 127 0 K 075386 20 Kpp od 27.05.2020. godine; Presuda Općinskog suda Banovićima, br. 127 0 K 075251 20 K od 04.05.2021. godine, sa dopisom; Izvještaj o izvršenom pretresu osobe bez naredbe MUP TK – PU Banovići, br. 08-0/13-1-03.3-1079/20 od 23.4.2020. godine; Foto – dokumentacija broj 08-06/13-1-79/20 od 23.04.2020. godine; Izvod iz kaznene evidencije od 11.05.2022. godine za A.E.; Nalaz i mišljenje vještaka hemijske struke Š. H., Sektor krim.policije - MUP TK, broj 08-06/3-7-03.6-1-1601/20 od 02.06.2020. godine, zajedno sa jednom bijelom papirnom kovertom koja je zatvorena žutom trakom sa oznakom DOKAZ na kojoj je ispisano „Kantonalno tužilaštvo tuzlanskog kantona PRILOG uz akt broj: 08-06/3-7-03.6-1-1601/20 od 02. juna 2020. godine, 1,927 (0,775+0,613+0,539) grama biljne materije (interno označene sa 1,2 i 3), 2,271 (0,757+0,676+0,838) grama biljne materije (interno

označene sa 4,5 i 6), 0,643 grama biljne materije (interno označena sa 7), 1,774 (0,436+1,338) grama stvrdnute materije (interno označene sa 8 i 9) A.E., pohranjeno kod ovog suda pod brojem KDP-3/22; Naredba za hemijsko vještačenje KT TK Tuzla br. T03 0 KTA 0088499 20 od 21.05.2020. godine, saslušan je vještak Š. H.

U završnoj riječi zastupnik optužbe je izjavio da uzimajući u obzir činjenicu da je optuženi A.E. na glavnom pretresu priznao krivnju za krivično djelo – Neovlaštena proizvodnja i stavljanje u promet opojnih droga – iz člana 238. stav 1. Krivičnog zakona F BiH, koje mu se stavlja na teret, predlaže sudu da istog oglasi krivim i izrekne mu krivično-pravnu sankciju shodno odredbama KZ F BiH, a da prilikom izbora vrste i visine krivično-pravne sankcije kao olakšavajuću okolnost cijeni činjenicu da je optuženi danas priznao izvršenje krivičnog djela, a od otežavajućih okolnosti da je optuženi višestruki povratnik u vršenju krivičnih djela.

U završnoj riječi branilac optuženog je izjavio da obzirom na činjenicu da je optuženi na priznao izvršenje krivičnog djela, te na taj način u potpunosti doprinio ispunjenju načela efikasnosti i ekonomičnosti postupka, te da se ta okolnost može cijeliti kao olakšavajuća prilikom izricanja vrste i visine krivično-pravne sankcije, i da je nesporna činjenica da je optuženi do sada više puta osuđivan, ali da se ne radi o istovrsnim krivičnim djelima, te da se radi o krivičnim djelima koja su vršena u prošlosti i koja su po sili zakona trebala biti brisana, te da je optuženi zasnovao stalni radni odnos u rudniku, da je kreditno zadužen, da se brine sam o domaćinstvu, te da pomaže stare i bolesne roditelje koji nemaju nikakvih prihoda za život, i da se iskreno kaje za navedeno djelo, i obećava da se u budućnosti ovakve stvari neće desiti, jer u zadnje dvije godine kako je zasnovao stalni radni odnos u potpunosti se promijenio, promijenio je društvo, te planira uskoro zasnovati i vlastitu porodicu, pa u konačnici predlaže sudu da sve ove činjenice uzme u obzir kao olakšavajuće prilikom izricanja sankcije.

Optuženi A.E. je izjavio da je saglasan sa završnim izlaganjem njegovog branioca, da se kaje za počinjeno krivično djelo i da obećava da više neće činiti krivična djela, da je zaposlen za stalno u RMU Banovići i moli sud da ima obzira prilikom izricanja krivično-pravne sankcije.

Iz Potvrde MUP TK - Policijska uprava Banovići, o privremenom oduzimanju predmeta od 22.4.2020. godine, proizilazi da je od A.E. sin M., privremeno oduzeti predmeti i to: 1). 3 x pvc. vrećica bijele boje, 3 x pvc. vrećica prozirne boje, 1 x pvc. vrećica plave boje i 1 x pvc. vrećica crvene boje u kojima se nalazi biljna materija zelene boje koja svojim izgledom asocira na opojnu drogu cannabis; 2). 1 x pvc. vrećica plave boje u kojoj se nalazi bijela praškasta materija koja svojim izgledom asocira na opojnu drogu spid; 3). jedna pvc. prozirna vrećica u kojoj su se nalazili naprijed navedeni predmeti.

Iz Nalaza i mišljenje vještaka hemijske struke H. Š., Sektor kriminalističke policije, MUP TK, broj 08-06/3-7-03.6-1-1601/20 od 02.06.2020. godine, proizilazi da je vještak po naredbi za hemijsko vještačenje KT TK Tuzla broj T03 0 KTA 0088499 20 od 21.05.2020. godine, izvršio ispitivanje praškaste i biljne materije nađene kod A.E. i da je zadatak vještačenja bio da li nepoznata materija nađena kod A.E. sadrži psihoaktivne supstance, te da je na vještačenje je dostavljeno 2,017 (0,805+0,643+0,569) grama biljne

materije upakovane u providne pvc.folije interno označene sa 1, 2 i 3; 2,361 (0,787+0,706+0,868) grama biljne materije upakovane u bijele pvc.folije interno označene sa 4, 5 i 6; 0,673 grama biljne materije upakovane u crvenu pvc.foliju interno označene sa 7; 1,814 (0,456+1,358) grama stvrdnute materije bijele boje koja se lako transformiše u praškastu materiju, upakovane u dvije plave pvc.folije interno označene sa 8 i 9; te da je ispitivanjem hemijskog sastava biljne materije iz sedam pakovanja označenih od 1 do 7, rađeno spot-test reakcijama i metodom tankoslojne hromatografije iz petroletarskog ekstrakta, a kao nesporni uzorak je korišten referentni rastvor tetrahidrocannabinola (THC), a da hemijska ispitivanja stvrdnute materije, označene br. 8 i 9, rađena su spot-test reakcijama i metodom tankoslojne hromatografije iz pripremljenih metanolskih ekstrakata, a kao nesporni uzorci su korišteni referentni rastvori heroina, kokaina, morfina, amfetamina, metamfetamina, metilendioksimetamfetamina (MDMA), difenhidramina, pemolina, kodeina i metilendioksiamfetamina (MDA), te je vještak na osnovu provedenih ispitivanja konstatovao da dostavljena biljna materija iz pakovanja označenih od 1 do 7, potiče od biljne vrste „cannabis sativa (L)“ - konoplje, i da biljna materija sadrži tetrahidrocannabinol (THC), a da je „cannabis sativa (L)“ – konoplja na listi opojnih droga pod rednim brojem 13., Tabela I („Sl.list BiH“, br. 8/06). Dalje je vještak utvrdio da stvrdnuta materija označena brojem 8 i 9, sadrži amfetamin, koji je na listi psihotropnih tvari – Tabela II (pod rednim 1.) („Sl.list BiH, br. 8/06).

Sud je u cijelosti poklonio vjeru nalazu i mišljenju vještaka hemijske struke H. Š., budući da je vještak vrlo stručan i afirmisan vještak na polju poznavanja droga i da se kao vještak za hemijsku oblast već duže vrijeme bavi ovom problematikom.

Iz provedenih dokaza utvrđeno je da je optuženi A.E. dana 22.04.2020.godine oko 14,20 sati, u ulici... u B., protivno članu 4. stav 1., članu 19. stav 1. i članu 20. stav 1. Zakona o sprečavanju i suzbijanju zloupotrebe opojnih droga, iako je znao da se radi o opojnim drogama i psihotropnim tvarima i da je držanje radi prodaje i prodaja istih zabranjena, što je i htio, a radi sticanja protivpravne imovinske koristi, kod sebe neovlašteno radi dalje prodaje držao tri pakovanja biljne materije, upakovane u tri providne pvc.folije, u ukupne količine 2,017 grama (0,805+0,643+0,569), tri pakovanja biljne materije, upakovane u tri bijele pvc. folije, u ukupne količine 2,361 grama (0,787+0,706+0,868) i jedno pakovanje biljne materije, upakovane u crvenu pvc. foliju, količine 0,673 grama, a koje biljne materije potiče od biljne vrste Cannabis sativa(L)-konoplje, a Cannabis sativa(L)-konoplje sadrži tetrahidrocannabinol (THC), i dva pakovanja stvrdnute materije bijele boje upakovane u dvije plave pvc folije, ukupne količine 1,814 grama (0,456+1,358) koja materija sadrži „Amfetamin“, u navedenim radnjama optuženog, posjedovanja opojne droge radi dalje prodaje, a čije je neovlašteno posjedovanje radi dalje prodaje zabranjeno, sud nalazi sva bitna obilježja krivičnog djela – Neovlaštena proizvodnja i stavljanje u promet opojnih droga - iz čl. 238. stav 1. Krivičnog zakona Federacije Bosne i Hercegovine.

Cijeneći izvedene dokaze, kao i priznanje optuženog u smislu čl. 280. ZKP-a FBIH, sud nalazi dokazanim da je optuženi A.E. počinio radnje opisane u izreci ove presude, a u tim radnjama nalazi sva bitna obilježja krivičnog djela – Neovlaštena proizvodnja i stavljanje u promet opojnih droga - iz čl. 238. stav 1. Krivičnog zakona Federacije Bosne i Hercegovine a, kako u objektivnom, tako i u subjektivnom smislu, zbog čega ga je sud i oglasio krivim za to djelo.

Kad se uzmu u obzir sve okolnosti, utvrđene činjenice i radnje koje je optuženi preduzeo, sve jasno ukazuje na svijest volju i namjeru optuženog da radnje izvršenja ovog krivičnog djela i izvrši, jer je optuženi kod sebe držao različite vrste droga spremnih za prodaju, čije je neovlašteno držanje radi dalje prodaje zabranjeno, što očigledno ukazuje da je optuženi ovo krivično djelo počinio sa direktnim umišljajem kao oblikom vinsti u izvršenju ovog krivičnog djela.

Kako nisu postojale činjenice niti okolnosti koje bi dovodile u pitanje uračunljivost optuženog to sud nalazi da je optuženi ovo krivično djelo počinio u stanju uračunljivosti.

Pri odlučivanju o vrsti i visini krivične sankcije, sud je imao u vidu olakšavajuće i otežavajuće okolnosti koje stoje na strani optuženog i počinjenog djela, a koje utiču da kazna bude manja ili veća. Od olakšavajućih okolnosti na strani optuženog, sud je našao i cijenio da je optuženi priznao izvršenje krivičnog djela dok od otežavajućih okolnosti na strani optuženog sud je našao da je optuženi višestruko kažnjavan, između ostalog i za istovrsna krivična djela, i da je optuženi povratnik u činjenju krivičnog djela.

Cijeneci sve naprijed izvedene dokaze i nabrojane olakšavajuće i otežavajuće okolnosti sud je optuženog za počinjeno krivično djelo oglasio krivim uz primjenu člana 238. stav 1. Krivičnog zakona Federacije Bosne i Hercegovine, te mu uz primjenu članova 41, 42, 43. i 49. KZ F BiH, utvrdio kaznu zatvora u trajanju od 1 (jedna) godine i 1 (jedan) mjesec, dok se na temelju člana 65. stav 1. i 64. stav 3. KZ F BiH, optuženom A.E. opozvao uvjetnu osudu izrečena presudom Općinskog suda u Banovićima broj 127 0 K 075251 20 K od 04.05.2021. godine, pravomoćna dana 21.05.2021. godine, pa je kaznu zatvora u trajanju od 3 (tri) mjeseca iz opozvane uvjetne osude uzeo kao utvrđenu, pa je Sud optuženog temeljem člana 54. stav 1. i 2. točka b) u vezi sa članom 64. stav 3. KZ F BiH, osudio na jedinstvenu kaznu zatvora u trajanju od 1 (jedne) godine i 2 (dva) mjeseca, nalazeći pri tome da su ispunjeni uvjeti za opozivom uvjetne osude iz presude Općinskog suda u Banovićima broj 127 0 K 075251 20 K od 04.05.2021. godine, sukladno članu 65. stav 1. KZ F BiH, obzirom da je optuženi krivično djelo za koje je oglasen krivim u ovom postupku počinio dana 22.4.2020. godine tj. prije nego što mu je uvjetna osuda izrečena, pa je Sud cijenio da nije bilo osnova za izricanje uvjetne osude da se znalo za djelo u ovom postupku, pri čemu oba krivična djela po svojoj prirodi spadaju u grupu kaznenih djela protiv zdravlja ljudi i to kaznena djela iz oblasti zlouporabe opojnih droga, a što u svojoj sveukupnosti ukazuje da između krivičnog djela iz ovog predmeta i krivičnog djela po presudi Općinskog suda u Banovićima 127 0 K 075251 20 K od 04.05.2021. godine postoji vremenska, prostorna i funkcionalna povezanost, dovoljnog intenziteta i kvalitete koja se traži članom 65. stav 1. KZ F BiH radi opoziva uvjetne osude.

Sud je mišljenja da izrečena kaznom zatvora od 1 (jedne) godine i 2 (dva) mjeseca predstavlja adekvatnu kaznu primjerenu težini počinjenog krivičnog djela i ličnosti optuženog, koji je do sada osuđivan i ima se kvalificirati kao specijalni povratnik u činjenju krivičnih djela zloupotrebe opojnih droga i da će izrečena kazna zatvora zadovoljiti svrhu kažnjavanja iz člana 42. KZ F BiH, uzimajući u obzir da već izrečena uslovna kazna za istovrsno krivično djelo nije na optuženog uticala da više ne čini krivična djela, već je nasuprot optuženi nastavio sa činjenjem krivičnih djela.

Na osnovu odredaba 78. st. 1. i članom 238. stav 4. KZ FBiH, odlučeno je da se od optuženog A.E. oduzima opojna droga i to: Cannabis Sativa L-konoplja, u količinama od 2,017 grama, 2,361 grama i 0,673 grama, i psihotropnu tvar Amfetamin težine 1,814 grama, tj. količine koje su ostale nakon provedenog hemijskog vještačenja, čije će uništenje izvršiti nadležni .

Na osnovu člana 202. stav 1. ZKP-a Federacije Bosne i Hercegovine, optuženi se obavezuje na plaćanje troškova sudskog postupka, a koji se sastoje od troškova sudskog paušala u iznosu od 50,00 KM i troškova na ime vještačenja u iznosu od 45,00 KM koji se odnose na troškove dolaska vještaka na glavni pretres vlastitim automobilom na relaciji Tuzla-Banovići-Tuzla, u roku od 30 dana od dana pravosnažnosti presude.

Zapisničar,  
Begzada Šehić

**S u d i j a**  
**Zlatko Šahinović**

**Pouka o pravnom lijeku:**

Protiv ove presude dozvoljena je žalba Kantonalnom sudu u Tuzli u roku od 15 (petnaest) dana od dana prijema prepisa iste. Žalba se podnosi putem ovog suda u 4 (četiri) istovjetna primjerka za sud i za stranke.